

Kata Pengalo – Ngalo Ras Momo

Turang ras senina i bas Tuhanta Jesus Kristus, selaku serayan Tuhan, ikataken kami mejuah-juah ras Selamat Wari Minggu man banta kerina. Man bandu kekelengen kami si sekali enda denga erkebaktin i bas gerejanta enda, ikataken kami mejuah-juah. Kerehenndu nambahi keriahen man banta kerina. I bas bena kebaktinta mari dage sidengkehken momo kerna perdalanen perpulungen Tuhan, bage pe rencana pelayanan gerejanta ku bas wari-wari si reh enda ([Ngogeken Momo](#)).

Kata Penaruh

=====

Minggu enda igelari Minggu Letare eme Minggu Passion sipelimaken si ertina “Teridahlah”. Ija i bas Minggu enda kita kerina ibabai guna nginget ras ngidah uga Tuhan Jesus Kristus enggo ngenanami kiniseran i bas IA erbahan si mehuli, i bas IA ngelawan si jahat, i bas IA mbela kegeluhen manusia, i bas IA mabai ras ngajari manusia ku bas geluh si mehuli. Emaka kalak si ngikutken IA, genduari i dilo guna ras IA ngenanami kiniseran i bas ndalanken si mehuli. Jesus kap terang doni enda, emaka kita selaku anak-anak terang i ajuk guna ncidahkan sinalsal terang e i bas kerina dampar kegeluhenta gelah arah si e terpuji gelar Dibata Bapanta i Surga.

(Paksa Teneng)

Marilah kita ersikap guna ndahi Tuhanta alu ngejapken uga belinna kekelengenNa nandangi kegeluhenta si dem alu kekurangan gelah kita ngasup ngataken bujur i bas kai pe si ibereken Tuhan man banta.

Erkata Lonceng

(Perp. Tedis)

Rende

KEE No. 348 : 1, 2, 3

(Serayan Kebaktin Bengket Ku Mimbar)

Kebaktin Minggu, 15 Maret 2026
Minggu Passion V / Letare : Teridahlah

3	Votum – Salam <i>(Perp. Tedis)</i>
L	I bas gelar Dibata Bapa, AnakNa Jesus Kristus ras Kesah si Badia. Lias ate Tuhan Jesus Kristus, kekelengen Dibata Bapa ras kerembaken Kesah si Badia ras kita kerina gelah. Amin.
P	Amin Amin Amin <i>(iendeken)</i>
4	Berita Kerna Perbahanen Ras Sura-Sura Dibata (Invocatio)
L	“Tetaplah paguh kinitekenndu janah lawanlah imbangndu e, sabap ietehndu maka teman-temanndu si sada kiniteken i belang-belang doni enda ngenanami kiniseran bagi si inanamindu” (1 Petrus 5 : 9). Mari radu ras kita muji Tuhan alu rende : KEE No. 311 : 1, 2, 3
5	Pengakun Kerna Kekoten I bas Kegeluhen <i>(Perp. Kundul)</i>
L	O Tuhan nehenlah kami anak-anakNdu si kote dingen dem salu kekurangan ras kelepaken. Si tuhuna la kami metungung i lebe-lebeNdu sabap Kam kap Bapa si dem alu kebadian, kekelengen ras kuasa, emaka tuhu-tuhu ngaku kami Tuhan, kalak perdosa kap kami.
L+P	Rende : KEE No. 446 : 1, 2
L	O Tuhan i bas kegeluhen kami rusur kami la nginget uga belinna perkuah ateNdu si nggit ngenanami kiniseran gancih kami. Uga belinna kekelengenNdu si nampati i bas perbeben kami subuk i bas sakit, pendahin kami, perbeliten ras i bas kai pe saja si jadi bas kegeluhen kami. Rusur kami nalahken Kam i bas kegeluhen kami, Tuhan sasapkenlah dosa kami.
L+P	Rende : KEE No. 76 : 1, 2
L	Rusur kami la ngukuri ise kami i lebe-lebeNdu, rusur kami erpengakap maka belinen kami asangken Kam. Arah kata, ras lagu langkah kami icurnaken kami gelarNdu Tuhan. Arah mata si arusna ipake kami guna ngenehen kemulian ras kekelengenNdu

	<p>rusuren ipake kami guna ngenen si la mehuli i bas kegeluhen kami. Alu babah si arusna ipake kami guna muji ras mpermuliaken gelarNdu rusuren ipake kami guna ngeranaken si la mehuli, cakap sumpah si nakiti pusuh teman kami terlebih-lebih Kam o Tuhan. Arah tan si arusna ipake kami guna namapati kalak i sekalewet kami ras ndahiken singena ateNdu rusuren ipake kami guna njemak ras ngelakoken si la ngena ateNdu. Arah nahe si arusna ipake kami guna erdalen i bas kebujurenNdu rusur ipake kami guna nilah i bas kebenaran ras mabai kami ku dalan si la mehuli si dem alu kinilabujuren. O Tuhan tuhu-tuhu ngaku kami maka geluh kami megati enggo ndauh iadepenNdu nari.</p> <p>L Mari sipindo gegeh idur Dibata nari arah ende-endenta : KEE No. 76 : 3, 4</p>
6	<p>Padan Dibata Man Kalak Si Ngakuken Dosana</p>
L	<p><i>“Bahan maka pusuhndu si getem encidahken atendu ceda. Adi uisndu saja nge icaingkenndu la kap bias.” Jeralah kempak TUHAN Dibatandu. Ia melias dengen dem perkuah ate. Ia persabar janah tetap icikepNa PadanNa. Tetap Ia nggit ngalemi dosandu, jenari la kam iukumNa”</i> (Joel 2 : 13).</p> <p>Meriah ukurta sabab ialemi Tuan kerina dosa ras kelepakenta, dengen iberena gegeh si mbaru man banta emaka si puji IA tole arah ende-endenta : KEE No. 96 : 1, 2, 3</p>
7	<p>Pendilo Guna Ikut i Bas Kiniseran Tuhan Jesus <i>(Perp. Tedis)</i></p>
L	<p><i>“Ngaloi Jesus nina, “Kukataken pe man bandu, maka ise pe si nadingken rumahna, seninana ntah turangna, nandena ntah bapana, anak-anakna ntah juma, erkite-kiteken Aku dengen erkite-kiteken Berita Si Meriah, genduari e pe ialokenna buen asa si ndai. Ialokenna seratus kali lipat: rumah, senina, turang, nande, bapa, anak ras juma, aminna gia mesera akapna erkiteken iayak-ayak kalak janah ialokenna pe pagi kegeluhen si tuhu-tuhu si la erkeri-kerin”</i> (Markus 10 : 29 – 30).</p> <p>Si jadi gegehta guna ikut i bas kiniseran Tuhan Jesus, rende kita i bas : KEE No. 279 : 1, 2, 3</p>

8	Kata Dibata <i>(Perp. Kundul)</i>
a	Marilah sibegiken Kata Dibata si man ogenken ibas Minggu enda sini ibuat ibas Kitab Jesaya 54 : 11 - 17 . Mari siogeken secara pegancih.....
	<u>Jerusalem si mbaru</u>
54:11 L	Nina TUHAN, “O Jerusalem, kuta si sangana mesera, kuta si medungu, si la lit ngapulisa. Kupanteki ka kam mulihi i babo batu sapir si meherga, janah kerina batu batandu kuleketken alu semin si mejilena.
54:12 P	Menara-menarandu Kubahan batu delima tembok-tembokndu batu permata; pintu-pintu gerbangndu batu si erndilap-erndihawarupana ernala-nala, bagi api si gara.
54:13 L	Aku jine kap si ngajari pendudukndu, e maka senang dengen dame geluhna kerina.
54:14 P	Kebujuren ras kebenaran mahanca kam megegeh, lanai lit si nindih kam, lanai lit si man kebiaren.
54:15 L	Adi iperangi kalak kam, labo bekasKu nuruh; ise si ngelawan kam la banci lang ndabuh.
54:16 P	Aku kap si njadiken tukang besi, si pegara api arang lako nepa senjata. Aku ka nge si njadiken tentera si make senjata e lako munuhi.
54:17 L	Tapi la lit senjata si banci nakiti kam; janah kasa kai si ngaduken kam italukenndu i bas pengadilen. Kerina suruh-suruhanKu Kubela; Kubereken bana kemenangan.” Bage nina TUHAN.
	<p style="text-align: center;"> Ketuahen kalak si megiken Kata Dibata, dengen si makekenca ibas geluhna si teptep wari. Haleluya. Ialoi perpulungen alu ngendeken : <i>Haleluya Haleluya Haleluya</i> </p>

b	Ertoto guna Khotbah
c	Khotbah : Johanes 9 : 1 - 12. Tema : “Teridah Min Kuasa Dibata”
d	Ertoto kenca khotbah
9	Pengakun Kiniteken <i>(Perp. Tedis)</i>
	<p>Aku tek man Dibata Bapa si la ersibar kuasaNa, si nepa langit ras doni.</p> <p>Aku tek man Yesus Kristus anakNa si Tonggal Tuhanta, si jadi arah Kesah si Badia, tubuh i dur singuda-nguda nari si so keliamen, tergelar si Maria, si ngenanami kiniseran sangana pemerintahen Pontius Pilatus, nipakuken ku kayu persilang, mate je nari ikuburken, nusur ku doni kematen, peteluwariken enggo keke ibas si mate nari, nangkih ku surga, perkundulna arah kemuhen Dibata Bapa si la ersibar KuasaNa, je nari reh me IA pagi ngeranaken si nggeluh ras si enggo mate.</p> <p>Aku tek man Kesah si Badia, janah lit sada Gereja si Badia, persadan kalak si Badia, pengalemi dosa, kinikeken kula, kegeluhen si rasa lalap.</p> <p>Amin.</p>
10	Persembahen <i>(Perp. Kundul)</i>
L	<p>Kata Dibata si jadi palas i bas kita nehken persembahen :</p> <p><i>“Geluhndu arus erpalasken keleng ate, bagi Kristus enggo engkelengi kita, dengen ngendesken kesahNa man gunanta. IA enggo mpersembahkan diriNa jadi persembahen si merim si ngena ate Dibata” (Epesus 5 : 2).</i></p> <p>Tupung siendesken persembahenta mari radu ras kita rende :</p> <p>KEE No. 343 : 1, 2, 3</p> <p>Pertoton Persembahen ras Syafaat</p>
11	Perpadanen Man Dibata <i>(Perp. Tedis)</i>
L	<p>Nina Jesus, Aku kap terang doni, ise singikutken Aku, ialokenna me terang si mereken kegeluhen, janah lanai IA erdalini i bas gelap. Emaka ersinalsallah min terang ndu selaku kalak si tek man Jesus.</p>

P	Tuhan tetap ate kami ncidahken terangNdu e i bas kerina dampar kegeluhen kami ras jadi kesaksin si nggeluh guna sekalewet kami.
L	Ise si ngikut Tuhan Jesus arus kap mersan kayu persilang i bas ndalani wari-wari si ibereken Dibata.
P	Tuhan, la aru ate kami i bas mersan kayu persilang e. Tapi tetap ate kami meritaken kiniulin ras kebujurenNdu i doni enda.
L	Sipeteguhi perpadanenta man Dibata, ras kita rende i bas : KEE No. 170 : 1, 2, 3
12	Pertoton Tuhan
13	Pengutusen Ras Pasu-pasu Dibata
	Turang ras senina si kukelengi, tetaplah ukurndu ola mbewat-mbewet. Mejingkatkanlah kam rusur i bas ndahiken dahin Tuhan, sabab si eteh labo sea-sea dahin si idahinkenndu i bas Tuhan. Emaka berkatlah alu mejuah-juah ras alokenlah pasu-pasu idur Dibata nari : <i>“Tapi kenca kam ngenanami kiniseran kentsik, serta me kam ibahan Dibata, si dem lias ate, si ndilo kam gelah ngenanami kemulianNa rasa lalap erkiteken persadannu ras Kristus, ipetetapNa dengen ipepegehiNa kam janah iberekenNa man banndu palas si nteguh. Dibata kap erkuasa seh rasa lalap” Amin.</i>
	Ialoi perpulungen alu ngendeken : <i>A..min</i> <i>A....min</i> <i>Amin</i>
	<i>SELAMAT HARI MINGGU/SYALOOM</i>